

桂海花木志
宋·范成大

○上元红

上元红，深红色，绝似红木瓜，花不结实，以灯夕前后开，故名。

○白鹤花

白鹤花如白鹤，立春开。

○南山茶

南山茶葩萼大倍中州者，色微淡，叶柔薄有毛，别自有一种，如中州所出者。

○红豆蔻花

红豆蔻花丛生，叶瘦如碧芦，春未发。初开花，先抽一干。有大箨包之。箨解花见，一穗数十蕊，淡红鲜妍，如桃杏花色，过重则下垂如葡萄，又如火齐纓络及剪彩鸾凤之状。此花无实，不与草豆蔻同种，每蕊心有两瓣相并，诗人托兴曰比目连理云。

○泡花

泡花，南人或名柚花。春未开，蕊圆白如大珠，既折则似茶花，气极清芳，与茉莉素馨相逼，番人采以蒸香，风味超胜。

○红蕉花

红蕉花，叶瘦类芦箬，心中抽条，条端发花，叶数层，日折一两叶，色正红如榴花荔子。其端各有一点鲜绿，尤可爱，春夏开正。岁寒犹芳，又有一种，根出土处特肥饱如胆瓶，名胆瓶蕉。

○枸那花

枸那花，叶瘦长，略似杨柳，夏开淡红花，一朵数十萼，至秋深犹有之。

○史君子花

史君子花蔓生，作架植之，夏开一簇，一二十葩，轻盈似海棠。

○水西花

水西花，叶如萱草，花黄，夏开。

○裹梅花

裹梅花，即木槿。有红白二种，叶似蜀葵，采红者连叶包裹黄梅。盐渍暴乾以荐酒故名，玉修花。春夏之交大发花且实，枝头硕果罅裂，而其旁红英粲然，并花实折钉盘筵，极可玩。

添色芙蓉花，晨开正白，午后微红，夜深红。

侧金盏花如小黄葵，叶似槿。岁暮开，与梅同时

。